


# Sivik Edukesen Studen Wokbuk

Ripablik blong Vanuatu




# Ol Seksen insaed long buk ia

Introdaksen .....	02
Lesen 1: Demokrasi hemi wanem?.....	04
Lesen 2: Sitisensip hemi wanem? .....	08
Lesen 3: Wanem nao i mekem wan gudfala Sitisen? .....	10
Lesen 4: Olgeta Raet mo Responsibiliti insaed long wan Demokrasi.....	12
Lesen 5: Olgeta Human raet.....	14
Lesen 6: Sivil Sosaeti.....	18
Lesen 7: Media mo Sosol Media (misinformation, disinformation) .....	20
Lesen 8: Sistem blong Gavman blong yumi long Vanuatu .....	24
Lesen 9: Wanem nao i mekem wan gudfala Lida? .....	28
Lesen 10: Olgeta Eleksen long Vanuatu .....	31
Lesen 11: Inkludum evriwan insaed long wan Demokrasi.....	33
Lesen 12: Fasin blong Vot.....	36
Lesen 13: Olgeta Eleksen Ofens mo Impotens blong Vot .....	42

## Ofis we i pablisim buk ia:

Vanuatu Elektrol Ofis mo Vanuatu Kurikulum Developmen Yunit.  
Wetem sapot blong Vanuatu Electoral Environment Project (VEEP)  
Pacific Ofis blong United Nations Development Programme (UNDP)  
©UNDP 2020 all rights reserved



# Wokbuk blong yu blong Sivik Edukesen

Welkam long Wokbuk blong Studen we bae go wetem yu tru long kos blong Sivik Edukesen we bae yu statem naoia.

I no longtaem bae yu gat 18 yia mo hemia i minim se yu kasem bigining blong wan niu laef olsem wan big man o woman. Taem yu gat 18 yia, yu kam olsem wan bigman o woman mo from hemia, bambae oli rikonaesem yu fulwan olsem wan responsibol sitisen folem loa. Hemia i kam wetem plante niufala raet, fridom mo responsibiliti.

Raet blong vot hemi wan long olgeta samting we hemi impoten tumas taem yu kam wan adult. I minim se yu save tekpat fulwan long politikol laef blong kaontri mo plei wan aktiv rol long laef blong komuniti mo kaontri.

Long priperesen blong bigfala step ia, i gat plante impoten samting we yu nid blong save long saed blong hao nao kaontri blong yumi i wok mo wanem nao olgeta raet mo responsibiliti we yu yu gat olsem wan sitisen. Kos ia bae hemi givhan long yu blong yu redi blong eksesaesem raet blong yu blong vot mo jusum hu i ripresentem yu olsem wan sitisen. Bambae yu putum responsibiliti long olgeta man ia blong lukluk long wei we oli ranem kaontri blong yumi long lokol, provinsol mo nasonal level, mo difendem olgeta intres blong yu mo olgeta long komuniti. So yu mas lanem blong mekem gudfala joes, harem save olgeta rul mo stap olsem wan man o woman blong vot we i save gud olgeta infomesen.

Hemi impoten blong luk save se olgeta yang pipol oli gat wan impoten pat blong pleim insaed long politik, from se olgeta desisen blong tede bae afektem olgeta samting tumoro. Olgeta yang pipol tu oli gat eneji blong wok had mo tingting kwik. Olgeta yut oli save mo oli shud soem intres long politik mo lanem abaot olsem wanem sistem i wok. Kos ia bae hemi soem long yu hao nao yu olsem wan yangfala, yu save tekpat blong shepem Vanuatu blong tumoro.

Fiuja i stap long han blong yu. Vanuatu blong yu!

**Plis lukaotem gud Wokbuk ia mo yu no mas raet long hem. Bambae ol narafala studen oli yusum afta long yu.**





# Lesen 1: Demokrasi hemi wanem?



## Vanuatu hemi wan demokrasi

Wan Demokrasi i minim gavman blong pipol we i stanap folem joes blong pipol, be i no tru long wan king o kwin, i no tru long wan dikteta, i no tru long wan rij man o woman mo olgeta fren blong hem, be gavman we i stanap tru long joes blong pipol (we oli singaotem olgeta tu olsem ol sitisen).

Demokrasi hemi wan fom blong gavman we pipol blong wan kaontri i disaed long hao oli wantem ranem kaontri. Olgeta oli disaed tu long hu i shud gavanem olgeta. Olgeta sitisen oli jusum ol representativ blong olgeta tru long ol eleksen we i stap tekem ples. Long evri dei laef blong pipol oli gat evri besik fridom olsem oli fri blong talem tingting blong olgeta, fri blong asosiet wetem ol narafala, go tugeta, bilif mo morol standed, mo sam narafala samting moa. Be olsem ol sitisen, olgeta tu oli gat ol responsibiliti.

Ol eleksen oli tekem ples folem ol period. Hemia hemi taem we evri sitisen ova long 18 yia we oli rejista blong kam olsem ol vota, oli go long ol pol blong vot long dei blong eleksen.

Moa long hemia, ol institusen olsem wan indipenden judiseri, wan fri press mo wan aktiv sivil sosaeti hemi protektem tu ol sitisen mo ol raet blong olgeta.

**Demos = Pipol**

**Kratos = Rul**

**Pipol i gat paoa**


**Gavman**

**Ol pipol oli save vot**

**Demokrasi**



# Tri blong Demokrasi



# Tri blong Demokrasi

Wan tri hemi wan samting we i laef, i strong be samtaem hemi wik. Sipos oli lukaotem gud, bambae hemi givim ol gudfala samting mo frut blong hem. Frut blong hem i dipen long evri narafala pat blong tri blong wok tugeta. Tri mo frut blong hem oli nidim atensen oltaem.

## Olgeta rut blong tri blong demokrasi

Ol fofala mein stamba tingting blong demokrasi oli olsem ol fofala mein rut blong tri:

- Pipol i holem paoa;
- Ekwality bitwin pipol;
- Konstitusenol Gavman;
- Individuol fridom.

## Stamba blong tri blong demokrasi

Stamba blong tri blong demokrasi blong yumi i holem ol branj mo frut mo i gat ol institusen we oli mekemap we i alawem blong stanap strong, i spred mo i karem frut. Hemia ol mein demokratik institusen ia:

- Eleksen;
- Konstitusen (Mama Loa);
- Palemen;
- Sistem blong Jastis;
- Sivil Sosaeti (ol sosol muvmen mo ol intres grup);
- Ol Politikol pati;
- Media, Raet blong Save & Sivik Edukesen;
- Lokol Gavman;
- Eksekutiv mo pablik administresen.

## Frut blong tri blong demokrasi

- Pis;
- Prosperiti;
- I no gat tumas Poveti;
- I no gat tumas Vaelens;
- Ol komuniti oli moa aktif;
- Rispek long evriman;
- Olgeta human being mo sosaeti oli kasem ful potensol blong olgeta;
- Impruvmen long kwaliti blong laef;
- Fridom.



# Lesen 2: Sitisensip hemi wanem?

## Sitisensip hemi wanem?

Sitisensip hemi stetes blong wan man we hemi stap olsem wan ligol memba blong wan nesen.


## Wanem nao hemi aedentiti blong yu?

Wan man hemi gat aedentiti blong hemwan mo aedentiti bes long grup o komuniti blong hem. Sam pat blong aedentiti blong wan man oli no save jenisim mo oli jusum ol narawan. Aedentiti hemi ol karakteristik, tradisen mo bilif tu we wan man o wan grup i yusum blong talem se oli semak o oli difren long ol narafala man o grup.



## Raetem ansa blong ol kwesten ia insaed long ekseesaes buk blong yu:

1. Wanem nao i mekem nasonal aedentiti blong wan Ni-Vanuatu?
2. Wan man we hemi wan Ratu i minim wanem?
3. Aedentiti blong wan nesen i kam wea?
4. Olsem wanem nao ol man we oli gat plante difren aedentiti oli save kam tugeta blong fomem wan nasonal aedentiti?



## Ligol aedentiti



“Evriwan i gat raet blong oli luksave hem long evri ples olsem wan man bifo long loa.”

Atikol 6 blong Universal Declaration of Human Rights

## From wanem ligol aedentiti hemi impoten

- Ol otoriti oli luksave yu olsem wan sitisen
- Ol raet mo responsibiliti olsem wan sitisen
- Akses long ol sevis blong gavman
- Raet blong save vot
- Travel/gat wan paspot
- Fasilitesen blong ol ofisol diling

Raetem wan sentens wetem toktok ia “Sitisensip” insaed long ekseesaes buk blong yu.



# Lesen 3: Wanem nao i mekem wan gudfala Sitisen?



**From wanem hemi impoten blong stap olsem wan gudfala sitisen?**

Raetem ol ansa insaed long eksesaes buk blong yu.



Olsem wanem blong yu kam wan gudfala sitisen:

1. Voluntia insaed long komuniti blong yu
2. Yu mas hones mo man i save trastem yu
3. Folem ol rul mo loa
4. Rispektem ol raet blong ol narafala man
5. Save long ol samting we i stap hapen raon long yu
6. Rispektem propeti blong ol narafala man
7. Lukaot long ol narafala man
8. Tekem responsibiliti blong ol aksen blong yu
9. Yu wan gudfala neiba
10. Protektem envaeronmen
11. Rispektem ol nasonal simbol, flag mo nasonal antem
12. Givim blad / plasma spos i nid
13. Vot

## **Eksesaes: Wanem nao i mekem wan gudfala sitisen (Ranking Eksesaes)**

Ol 3 top kwaliti blong mi olsem wan gudfala sitisen.

Raetem namba 1 kasem 3 insaed long eksesaes buk blong yu mo raetem ol ansa blong yu.

## **Eksesaes: Raetem wan 'Essay'**

Raet kasem 400 wod insaed long eksesaes buk blong yu abaot topik ia:

**From wanem nao hemi impoten blong stap olsem wan gudfala sitisen?**





# Lesen 4: Olgeta Raet mo Responsibiliti insaed long wan Demokrasi

## Ol demokratik raet blong yumi oli kam wetem ol responsibiliti

Wan responsibiliti hemi wan wok o wan samting we yu mas mekem.

Hemi samting we yu shud mekem blong rispektem, promotem mo holem taet samfala raet. Wan eksampol hemi raet blong vot we i kam wetem responsibiliti blong yu kastem vot blong yu folem stret fasin mo pepos blong hem.


Tout droit s'accompagne de responsabilités. Une responsabilité est un devoir ou une obligation. C'est quelque chose que vous devez faire pour respecter, promouvoir et maintenir certains droits. Par exemple, le droit de vote s'accompagne de la responsabilité de voter en connaissance de cause et de manière réfléchie.



## Olgeta Raet

- Fridom blong muvmen:** Yu gat raet blong muv fri long wan kaontri i go long wan narafala kaontri mo tu insaed long ol kaontri.
- Fridom blong toktok:** Yu gat raet blong talem tingting blong yu mo bae i no gat wan man i stopem o panisim yu.
- Raet long praevesi:** Yu gat raet blong liv long praevet mo kipim ol pesonal laef-stael we yu jusum oli praevet, insaed long hom blong yu.
- Fridom blong tingting, bilif mo relijen:** Yu gat raet blong fomem ol tingting blong yu, talem tingting blong yu, tingting long yuwan, mo jusum filosofi mo relijen blong yu.
- Fridom blong go tugeta (o fomem asosiesen):** Yu gat raet blong tekpat long wan pablik demonstrasen (maj o straek) be no mas putum laef blong man long risk o spolem propeti.
- Fridom long slevri:** Man i no save mekem yu fraet o panisim yu blong fosem yu blong wok (mo sipos yu wantem mekem o no).
- Raet blong vot:** Yu gat raet blong tekpat long demokrasi blong yumi tru long fasin blong jusum ol representativ blon gyu tru long ol eleksen. Long Vanuatu, yu save vot taem yu gat 18 yia mo yu mas rejista blong stap long elektrol roll.

## Ol Raet & Responsibiliti







# Lesen 5: Human Raet hemi wanem?

Human raet hemi ol raet mo fridom we evriman i gat stat long taem we hemi bon, from nomo se hemi wan 'human being'.

Universal Declaration of Human Rights i setemaot 30 raet we i aplae long evri human being long wol.

Ol raet ia oli no ol privilej we i nid blong winim mo oli aplae long wan ikwel fasin long evriwan, nomata long ej, jenda, kala blong skin, kalja, wanem we yu gat o sosol standing. Ol raet ia bae i no gat eniwan i save tekemaot long yu inkudum gavman.



## Eksesaes: Olgeta Karakteristik blong Human Raet

### Tru o I No Tru?

Insaed long eksesaes buk blong yu, raetem namba 1 kasem 5. Ridim olgeta stetmen we i stap daon ia, mo tingbaot se oli tru o oli no tru. Raetem "tru" o "I no tru" long saed blong wanwan namba.

Ol Human Raet hemi:

1. Olgeta entaetolmen ia we wan man i gat from se hem hemi human (raet long laef, edukesen, kakae, ruf ova long hed, etc). Human raet hemi no wan samting we man i pem, i winim o oli pasem long hem; ol samting ia oli blong pipol from nomo se oli human.
2. Ol raet we oli naturol mo God i givim.
3. Ol besik standed we pipol bae no save liv gud wetaot olgeta standed ia.
4. Ol raet we bae oli no save tekemaot long olgeta; no gat man i gat raet blong karemaot ol raet blong wan man blong eni risen we hemi gat. Ol pipol oli stil gat ol human raet nomata sipos ol loa blong kaontri blong olgeta i no rikonaesem olgeta, o sipos oli no rispektem ol raet blong olgeta - eksampol, long taem blong slevri, ol slev oli stil gat ol raet nomata se oli no rispektem ol raet blong olgeta.
5. Oli semak long ol raet blong evri human being nomata long kala blong skin, sipos oli man o woman, wanem relijen, politikol o narafala lukluk, nasonal o sosol orijin. Yumi evriwan yumi bon fri, mo ikwol long digniti mo ol raet - human raet hemi kavremap evri man raon long wol.

### "Tritim ol narawan long semak fasin we yu wantem olgeta oli tritim yu wetem."

Taem yumi talem se wanwan man i gat ol human raet, yumi stap talem tu se wanwan man i gat ol responsibiliti blong rispektem human raet blong ol narafala.

### Homwok

Jusum wan long ol trifala kategori blong Human Raet mo raetem wan sotfala 'essay' abaot wanem we hemi minim long yu mo hao hemi aplae long Vanuatu.

### Ol trifala kategori blong Human Raet hemi:

1. Ol Sivil mo politikol raet;
2. Ol Ekonomik mo sosol raet;
3. Ol Envaermentol, kaljurol mo divelopmentol raet.



# Univesol Dekleresen Blong Ol Human Raet

<p><b>1</b></p> <p><b>Yumi evriwan yumi bon fri mo semak</b></p> <p>Yumi evriwan yumi bon fri. Yumi evriwan i gat ol tingting blong yumiwan. Yumi shud kasem semak tritmen.</p>	<p><b>2</b></p> <p><b>No tritim nogud narafala man</b></p> <p>Ol raet ia hemi blong evriwan, nomata long ol difrens blong yumi.</p>	<p><b>3</b></p> <p><b>Raet long laef</b></p> <p>Yumi evriwan i gat raet long laef, mo blong liv long fridom mo sefti.</p>
<p><b>4</b></p> <p><b>No Slevri</b></p> <p>No gat man i gat raet blong mekem yumi kam wan slev. Mo yumi no save mekem eniwan i kam wan slev.</p>	<p><b>5</b></p> <p><b>No mekem man i safa</b></p> <p>No gat man i gat raet blong mekem yumi harem nogud o mekem yumi safa.</p>	<p><b>6</b></p> <p><b>Yu gat ol raet nomata long ples we yu go long hem</b></p> <p>Mi mi wan man olsem yu nomo!</p>
<p><b>7</b></p> <p><b>Yumi Evriwan i Ikwol Bifo long Loa</b></p> <p>Loa i semak blong evriwan. Hemi mas tritim yumi evriwan long wan fasin we i fea.</p>	<p><b>8</b></p> <p><b>Loa i protektem ol Human Raet blong yu</b></p> <p>Yumi evriwan i save askem loa blong givhan long yumi taem wan man i no tritim yumi long wan wei we i fea.</p>	<p><b>9</b></p> <p><b>Holem taet wan man long wan wei we i no stret</b></p> <p>No gat man i gat raet blong putum yumi long kalabus wetaot gud risen mo holem taet yumi long ples ia, o sendem yumi aot long kaontri blong yumi.</p>
<p><b>10</b></p> <p><b>Raet long Trael</b></p> <p>Sipos we oli putum yu long trael, hemia i shud stap long pablik. Olgeta we oli traelem yumi oli shud no letem eniwan i talem wanem blong mekem long olgeta.</p>	<p><b>11</b></p> <p><b>Yumi inosen olwe kasem taem oli pruvum se yumi gilti</b></p> <p>Yumi no shud blemem eniwan from wan samting kasem taem we i gat pruf blong hem. Taem pipol i se yumi mekem wan rabis samting, yumi gat raet blong soem se hemi no tru.</p>	<p><b>12</b></p> <p><b>Raet long Praevesi</b></p> <p>No gat man i shud traem blong spolem gudfala nem blong yumi. No gat man i gat raet blong kam insaed long haos blong yumi, openem ol leta blong yumi, o distebem yumi o famili blong yumi wetaot wan gudfala risen.</p>
<p><b>13</b></p> <p><b>Fridom blong muv</b></p> <p>Yumi evriwan i gat raet blong go long ples we yumi wantem go long hem long kaontri blong yumi mo blong trave olsem we yumi wantem.</p>	<p><b>14</b></p> <p><b>Raet blong lukaotem wan Sef Ples blong Stap long hem</b></p> <p>Sipos yumi fraet blong oli tritim no gud yumi long kaontri blong yumi, yumi evriwan i gat raet blong ronwe i go long narafala kaontri blong stap sef.</p>	<p><b>15</b></p> <p><b>Raet long wan Nasonaliti</b></p> <p>Yumi evriwan i gat raet blong pat long wan kaontri.</p>

<p><b>16</b></p> <p><b>Mared mo Famili</b></p> <p>Evri bigman i gat raet blong mared mo gat wan famili sipos oli wantem. Ol man mo woman oli gat semak raet taem oli mared, mo taem oli seperet.</p>	<p><b>17</b></p> <p><b>Raet long ol samting blong yuwan</b></p> <p>Evriwan i gat raet blong gat samting blong olgeta mo serem olgeta. I nogat man i save tekemaot ol ting blong yumi wetaot wan gud risen.</p>	<p><b>18</b></p> <p><b>Fridom blong tingting</b></p> <p>Yumi evriwan i gat raet blong biliv long wanem yumi wantem bilivim, blong gat wan relijen, o blong jenis sipos yumi wantem.</p>
<p><b>19</b></p> <p><b>Freedom of expression</b></p> <p>Nous avons le droit d'avoir nos propres points de vue, de penser ce que nous voulons, de dire ce que nous pensons et de partager nos idées avec d'autres personnes.</p>	<p><b>20</b></p> <p><b>Raet long Pablik Asembli</b></p> <p>Yumi evriwan i gat raet blong mitim ol fren blong yumi mo wok tugeta long pis blong difendem ol raet blong yumi. No gat man bae mekem yumi joenem wan grup sipos yumi no wantem.</p>	<p><b>21</b></p> <p><b>Raet long Demokrasi</b></p> <p>Yumi evriwan i gat raet blong tekpat long gavman blong kaontri blong yumi. Evri bigman i shud alao blong jusum ol lida blong olgeta.</p>
<p><b>22</b></p> <p><b>Sosol Sekuriti</b></p> <p>Yumi evriwan i gat raet blong save pem haos, meresin, edukesen, mo jaelkea we i jip, mo inaf mani blong liv mo kasem medikol kea sipos yumi sik o yumi kam olfala.</p>	<p><b>23</b></p> <p><b>Raet blong ol Wokman</b></p> <p>Evri bigman i gat raet blong mekem wan wok, gat wan fea salari blong wok blong olgeta mo joenem wan tred yunion.</p>	<p><b>24</b></p> <p><b>Raet blong Pleple</b></p> <p>Yumi evriwan i gat raet blong rest long wok mo rilaks.</p>
<p><b>25</b></p> <p><b>Kakae mo shelta blong evriwan</b></p> <p>Yumi evriwan i gat raet long wan gud laef. Ol mama mo pikinini, pipol we oli olfala, oli no wok mo gat spesel nid, mo evri pipol oli gat raet blong oli lukaotem gud olgeta.</p>	<p><b>26</b></p> <p><b>Raet long Edukesen</b></p> <p>Edukesen hemi wan raet. Praemeri skul i shud fri. Yumi shud lanem abaot United Nations mo hao blong progres wetem ol narafala. Ol papa mo mama blong yumi oli save jusum wanem blong yumi lanem.</p>	<p><b>27</b></p> <p><b>Kopiraet</b></p> <p>Kopiraet hemi wan spesel loa we i protektem ol atistik kriesen mo raeting blong wan man: ol narawan oli no save kopi wetaot pemisen. Yumi evriwan i gat raet long wanwan wei blong living mo enjoyem ol gud samting we i kam werem 'Art', Saens mo lening.</p>
<p><b>28</b></p> <p><b>Wan Wol we i fea mo i fri</b></p> <p>I mas gat gudfala oda blong yumi save enjoyem ol raet mo fridom blong yumi insaed long kaontri blong yumi mo raon long wol.</p>	<p><b>29</b></p> <p><b>Responsibiliti</b></p> <p>Yumi gat wan diuti long ol narafala pipol, mo yumi shud rispektem ol raet mo fridom blong olgeta.</p>	<p><b>30</b></p> <p><b>I No Gat Wan Man i Save Tekemaot ol Human Raet blong Yu.</b></p>

United Nations





# Lesen 6: Sivil Sosaeti

## Sivil Sosaeti

Sivil Sosaeti hemi fom wetem ol oganaesesen ia we oli no asosiet wetem gavman. Hemia i inkludum sam skul mo yunivesiti, ol advokesi grup, ol profesonal asosiesen, ol leba yunion, ol jej, mo ol kaljurol institusen. Sivil Sosaeti i ofarem wan envaeronmen blong ol sosol muvmen, self-oganaesesen grup mo ol man, blong operet hem wan mo indipenden long steit.

### Eksesaes: Diskasen

Wanem ol Sivil Sosaeti Oganaesesen we yu save long Vanuatu?

### Eksesaes: Posta

Wetem ol klasmet blong yu, yufala i krietem wan posta we ripresentem wan aktiv Sivil Sosaeti.

Sipos yu no gat wan bigfala pepa blong mekem wan bigfala posta, yu save putum plante A4 pepa tugeta.


### Sivil Sosaeti hemi wanem?

Sivil Sosaeti hemi fom tru long ol odinari pipol we oli stap wok tugeta olsem wan grup. Ol grup ia oli kolem Civil Society Organisations (CSOs) mo tu olsem ol Non-Governmental Organisations (NGOs) mo ol Faith Based Organisations (FBOs).





# Lesen 7: Media mo Sosol Media in- saed long wan Demokrasi (désinformation, mésinformation)



Media hemi wan toktok we i kavremap ol difren fasin blong komuniket: brodkast long TV mo radio, pablisim nius long niuspepa mo intanet.

Media i plei wan impoten rol long saed blong mekem pablik aweanes mo givim infomesen we i fomem atitud mo pablik opinion.

Media hemi wan tul we i strong tumas nomata se hemi televisen, radio o intanet. Sosol media hemi ekspandem influens blong hem kwiktaem long evri pat blong laef blong yumi.



## Sosol Media:

Tokbaot ol wei we ol pipol oli yusum blong interakt bitwin olgeta blong krietem, serem, mo/o pasem infomesen mo ol tingting tru long ol sosol netwok. Hemia sam long olgeta mein sosol media platform:



## Lukaot long Sosol Media

Yu mas luksave mo haremsave se sosol media i gat ol denja olsem we oli eksplenem daon ia:

### Confirmation bias :

Ol lukluk blong yumi abaot wanem we i tru o wanem infomesen yumi save trastem, i dipen plante taem long hao nao niu infomesen ia i go wetem wanem we yumi stap biliv long hem finis (plante taem yumi bilivim samtung se hemi tru sipos hemi folem ol bilif blong yumi).

### Echo chamber :

Yumi luk mo harem moa abaot wanem we yumi agri long hem finis long ol sosol media apdeit blong yumi (ol apdeit ia long hom pej oli kam wan 'Echo Chamber' - ol tingting blong yumi oli mekem noes raon long yumi nomo bakegen).

### **Fake News :**

Toktok ia hemi rifea long ol kiaman o ol stori we oli no tru we oli kamaot olsem ol niu infomesen, we pipol i spredem long intanet o tru long ol narafala fom blong media, mo plante taem oli krietem ol nius ia blong influensem ol politikol vii o olsem wan samting blong mekem fani long hem.

### **Misinformation :**

Taem pipol i serem wan infomesen we i no tru, be oli no minim blong spolem eniwan.

### **Disinformation :**

Taem pipol i serem o oli minim blong givim kiaman infomesen.

## **Tingbaot se wanem we yu raetem, laekem, mo serem long sosol media:**

“No gat wan samting we yu mekem o talem onlaen hemi praevet, mo evri samting yu mekem o talem onlaen bae stap ia nao”.



# **Olsem wanem blong luksave ol kiaman nius**



### **Jekem Sos blong Infomesen**

Klik long Sos festaem blong faenemaot infomesen long websaet, misen blong hem mo ol kontak infomesen blong hem.



### **Ridim ful storian**

Ol hedlaen oli save shokem man we i rid blong mekem hemi klik long ol link. Wanem nao ful storian?



### **Jekem Man we i raetem Nius**

Lukaotem infomesen abaot Man we i raetem nius ia. Bae yu save trastem infomesen we oli serem? Wanem hemi talem i tru?



### **Ol nara Sos we oli sapotem infomesen**

Klik long ol narafala link. Luk sipos infomesen we i kamaot hemi sapotem gud storian ia.



### **Jekem Deit**

Fasin blong serem o postem ol ofala nius i minim se oli rilet yet long wanem we i stap gohed naoia.



### **Hemia i Tru ia? Mekem risej.**

Sipos hemi go tumas, ating hemi stap mekem fani ia. Jekem websaet mo man we i raetem nius blong yu sua long infomesen.



### **Wanem Bilif blong yu**

Luk sipos ol Bilif blong yu bae save jenisim lukluk blong yu long saed ia.



### **Askem ol Ekspet**

Askem wan man we i wok long laebri, o go long wan websaet blong jekem infomesen ia.



# Lesen 8:

## Gavman mo Lidasip: Sistem blong Gavman blong yumi long Vanuatu



### Vanuatu hemi wan demokratik kaontri

Konstitusen (Mama Loa) blong yumi i talem se: "Long Vanuatu bambae ol sitisen oli holem paoa blong rulum kaontri mo bambae oli elektem ol memba blong Palemen we bambae oli givim paoa long olgeta blong oli rul."



### Long Vanuatu, i gat tri (3) ofisol branj blong paoa:



#### Lejislesa

Fes wan hemi LEJISLESA. Hemia hemi olgeta Memba blong Palemen blong yumi we oli gat paoa blong mekem ol loa blong kaontri from we ol sitisen oli elektem olgeta.



#### Judisieri

Nambatu hemi JUDISIERI. Hemia hemi ol Kot, loea, majistret mo jaj we oli intapretem ol loa blong kaontri.



#### Eksekutiv


Nambatri hemi EKSEKUTIV. Hemi olgeta we oli aplae ol loa mo polisi blong gavman. Praem Minista mo Kaonsel blong ol Minista nao oli fomem Eksekutiv, we i fomem Gavman.

### Seperesen blong ol Paoa

Ol trifala branj blong gavman – lejislesa, eksekutiv mo judisieri – oli gat ol seperet, independen paoa mo responsibiliti. Hemia blong mekem se olgeta long wan branj oli no gat konflik wetem olgeta long tufala narafala branj. Hemia nao oli singaotem "Seperesen blong ol Paoa".

### Tri (3) level blong gavman: Nasonal, Provinsol mo Munisipol

Long Vanuatu, yumi gat tri (3) bodi we oli ripresentem pipol long Nasonal, Provinsol mo Munisipol level.



## 1. Nasonal Palemen

Nasonal Palemen blong Vanuatu hemi gat 52 memba. Oli kolem olgeta ol Memba blong Palemen o ol MP.

Palemen hemi fom tru long olgeta representetiv we pipol i elektem olgeta. Taem oli win long wan eleksen from pipol i vot from olgeta, oli kam ol MP, mo oli stap blong wan period blong fo (4) yia.

## 2. Olgeta Provinsol Kaonsel

I gat siks (6) provins long Vanuatu mo wanwan long olgeta i gat wan Provinsol Kaonsel:


**Torba**  
**Sanma**  
**Penama**  
**Malampa**  
**Shefa**  
**Tafea**

Pipol i elektem ol Provinsol Gavman Kaonsel blong wan period blong fo (4) yia. Minista blong Intenol Afea i apoentem sam memba tu blong ripresentem ol jif, jej, woman mo yangfala. Aot long olgeta kaonsela, bambae oli elektem wan Jeaman olsem hed blong Kaonsel.

## 3. Olgeta Munisipaliti

I gat tri munisipaliti long Vanuatu:

**Luganville (Espiritu Santo)**  
**Port-Vila (Efate)**  
**Lenakel (Tanna)**



## Eksesaes: Olgeta Kwesten

Insaed long ekksesaes buk blong yu, raetem ansa blong ol kesten ia:

- Wanem nem blong Praem Minista?
- Wanem nem blong Memba blong Palemen (MP) blong konstituensi blong yu?
- Wanem nao wok blong wan Memba blong Palemen?
- "Seperesen blong ol Paoa" hemi wanem?
- 





# Lesen 9: Wanem nao i mekem wan gudfala Lida?

## Wan Gudfala Lida

Wok had blong pipol, munisipaliti, provins, mo nesen blong hem

Harem save mo i rispektem ol loa blong Vanuatu

Hemi no fraet blong toktok

Meksua se evriwan i kasem ol besik sevis

Wok plante insaed long komuniti

Gat bilif long pipol we hemi lidim

Nem blong hem i gud mo gat strong merit

Mekem evri efotblong bildimap wan strong nesen

Mekem samting folem stret fasin

Responsibol long ol aksen blong hem

Hemi hones

Lisen long pipol

Rispektem ol stamba tingting blong ol Kristen mo ol Melanesian Valiu



### Eksesaes: Olgeta kwaliti blong wan gudfala lida

Raetem list blong ol kwaliti we wan gudfala lida i gat insaed long eksesaes buk blong yu. Wan gidfala lida hemi wan man we hemi:

- lisen long pipol mo hemi kea long ol nid blong olgeta;
- putum ol nid blong pipol feswan;
- hones mo hemi no pat insaed long fasin blong korapsen;
- yusum mani blong gavman blong impruvum laef blong pipol insaed long komuniti;
- mekem sua se komuniti i kasem wanem hemi nidim olsem ol rod, skul mo ol helt klinik;
- fea mo tritim evriwan semak mo wetem rispek;
- faet blong impruvum laef olgeta we oli pua, ol komuniti we oli moa smol, olgeta we oli no strong mo oli gat spesel nid;
- kea abaot neija mo envaeronmen

Fasin blong wan man i moa impoten bitim hao hemi luk, jenda, maritol stetes blong hem, rilesensip blong hem wetem yu mo komuniti etc.

Wanwan long yumi i gat ol difren lukluk long wanem nao hemi moa impoten mo evriwan i gat raet long tingting long hem wan. Be blong vot o jusum gud lida blong yu, yu shud tekem taem blong faenemaot plante infomesen abaot kandidat blong yu.



**Kwesten blong klas i tokraon long hem (o tingting/wok tugeta/serem tingting):**

**Man i bon blong i kam wan lida o hemi bildimap hem wan blong kam wan lida?**




## Olgeta Woman oli ol gudfala lida

Raon long wol, ol woman oli kam moa konfiden mo pipol oli stap kam blong luk save se ol woman oli ol gud lida.

Ol woman oli ol gudfala lida from se oli putum ol pikinini mo komuniti blong olgeta feswan. Oli tingbaot fiuja from oli tingbaot ol pikinini blong olgeta mo oli mekem plan blong fiuja.

Plante woman long ol profesonal posisen oli rispektem olgeta from se oli hones, oli oganaesem gud olgeta, oli save mekem gud wok blong olgeta mo oli gat save.

Haf blong populesen hemi ol woman. Vanuatu i gat plante woman we oli wok had, oli gat talent mo oli profesonal. Nomata se hemi moa had blong wan woman, be yumi gat plante woman we oli kwalifae we oli save mekem wan gudfala wok blong representem komuniti blong olgeta mo faet blong impruvum living kondisen.



# Lesen 10: Olgeta Eleksen long Vanuatu

Wan eleksen hemi prosija we ol sitisen blong wan kaontri oli folem blong jusum ol representativ mo lida blong olgeta.

Ol eleksen oli mas tekem ples ples oltaem blong mekem se ol ofisol we oli elektem olgeta oli kontinu blong stap akaontebol long pipol. Sipos we oli no mentenem ol responsibiliti blong olgeta long ol vota, bambae oli save lusum vot long neks eleksen.

Wan karakteristik blong demokrasi hemi evri otoriti o paoa we hemi kamaot long pipol. Pipol nao i disaed.

Yumi vot from ol man (ol representativ blong yumi) blong mekem wanem we yumi nidim mo wantem olgeta blong mekem. Sipos yumi laekem hao oli ripresentem yumi, yumi save vote long olgeta bakegen. Be sipos yumi no laekem hao oli ripresentem yumi, yumi save vot long difren man.



## Fri mo fea, tru mo man i save bilivim

Demokrasi hemi wan samting we hemi moa long fasin blong holem ol eleksen. Be, wan long ol fundamentol kondisen blong hem hemi Fri mo Fea eleksen. Insaed long wan demokrasi, oli eksesaesem mo transferem paoa long taem blong regula, ikwol, fri mo sikret eleksen. Wan eleksen hemi honese mo valid long wan demokrasi nomo taem hemi ofarem ol ril altenetiv. Fridom blong toktok, fri infomesen, proteksen blong ol maenoriti mo fri oposisen oli ol fundamentol kondisen blong wan demokratik eleksen.

## Wan Fri mo Fea Eleksen hemi wanem?

Taem wan eleksen hemi fri, hemi minim se pipol i save jusum eniwan we, long ligol fasin, hemi entaetol blong oli jusum hem olsem wan kandidat, mo pipol oli no fraet long panismen spos oli vot long ol man ia.

Taem wan eleksen hemi fea hemi minim se evri vota mo ol kandidat oli tritim olgeta long semak fasin. I no gat eni samting i rong long kaonting blong vot, nogat man i akseptem wan mani we wan kandidat i givim o i nogat kiaman. Wan fea eleksen hemi wan eleksen tu we evri vota i gat semak opotuniti blong rejista, mo evriwan we i gat raet blong vot, bae oli no fraet o sem blong vot. Wan eleksen hemi fea taem oli kaontem evri vot, mo oli anaonsem ol risal we i soem stret total blong ol vot.

Eleksen i mas ofarem wan ril joes, we i minim se ol vota oli ams fri blong jus bitwin ol opsen. Mo antap long ol besik kraeteria ia, demokratik eleksen i shud tekem ples oltaem, long wan fasin we hemi ikwol mo sikret.

## Homwok:

Raetem ol trifala kwesten daon ia long eksesaes buk blong yu. Raetem wan ansa wetem moa diteil blong wanwan kwesten. Wanwan ansa bae shud luk olsem wan longfala paragraf.

1. Wanem nao pepos/wok blong ol eleksen long wan demokrasi?
2. Wanem nao pepos/wok blong ol representetiv long wan demokrasi?
3. Hao nao bae yu jusum gudfala kandidat blong yu blong vot long hem long wan eleksen?



# Lesen 11: Inkludum evriwan insaed long wan Demokrasi

## Disabiliti i no stopem man blong save mekem wanem we wan narafala man i save mekem

Oli demokratik sosaeti oli toktok plante long stamba tingting se evri pipol oli ikwol.

Ikwoliti i minim se evri man oli gat semak valiu, oli gat ikwol opotuniti, mo bae oli no save lukluk nogud long olgeta folem kala blong skin, bilif, klas, relijen, etnik grup o jenda blong olgeta.



## Grup blong pipol we oli nogat tumas opotuniti blong mekem samting o gat akses long ol besik sevis insaed long Sosaeti



### Discrimination... (Diskriminase)

Hemi rabis tritmen o fasin blong tritim nogud narafala man folem ol difren kategori blong pipol, speseli long saed blong kala blong skin, relijen, ej, jenda, disabiliti mo sam narafala samting bakegen.

### Equality... (Ikwoliti)

Hemi long saed blong mekem sua se evri man i gat ikwol opotuniti blong mekyus long ol talent blong olgeta. Mo tu hemi wan bilif se i nogat wan man i shud liv wan laef we i pua tumas folem hao hemi bon, wea ples hemi kam long hem, wanem we hemi biliv long hem, o sipos hemi gat wan disabiliti.

### Social Inclusion... (Sosol Inklusen)

hem i abaot pipol - speseli ol pipol we oli no gat tumas privilej - blong save pat long sosaeti, tru long ol opotuniti, akses long ol risos mo rispek blong ol raet.

Wan sosaeti we oli inkludum evriwan insaed long hem hemi wan we evri pipol oli filim se oli gat valiu, man i rispektem ol difrens blong olgeta mo oli mitim ol besik nid blong olgeta blong mekem se oli save liv gud.

### Social Exclusion... (Sosol Eksklusen)

hem i wan fom blong diskriminase. Hemi tekem ples taem pipol oli no pat long ekonomik, sosol mo politikol laef blong komuniti blong olgeta, bes long sam sosol klas o kategori we oli pat long hem long saed blong kala blong skin, relijen, ej, jenda, disabiliti etc.

Une société socialement exclusive se produit lorsque des personnes sont totalement ou partiellement exclues de la participation à la vie économique, sociale et politique de leur communauté, en raison de leur appartenance à une certaine classe, catégorie ou groupe social.





# Lesen 12: Fasin blong Vot

Vot long ol eleksen i givim yu janis blong gat wan voes long hu i ripresentem yu insaed long gavman.

Taem yu vot, yu stap jusum wan kandidat we yu tingse bae hemi ripresentem gud yu mo ol wish blong yu. Evri vot hemi impoten. Nomata sipos kandidat we yu jusum i no win, vot blong yu hemi ekspresem wanem we hemi impoten long yu mo komuniti blong yu.

Wan eleksen hemi prosija we ol sitisen blong wan kaontri oli folem blong jusum ol representetiv mo lida blong olgeta.

Ol eleksen oli mas tekem ples ples oltaem blong mekem se ol ofisol we oli elektem olgeta oli kontinu blong stap akaontebol long pipol. Sipos we oli no mentenem ol responsibiliti blong olgeta long ol vota, bambae oli save lusum vot long neks eleksen.



## Vot hemi wanem?

Taem yu kasem 18 yia, bambae yu save rejista olsem wan vota mo tekem pat long ol eleksen. Vot hemi wan impoten samting tumas we yu save mekem blong pat long laef blong kaontri. Sipos yu no vot, hemi olsem se yu stap kwaet nomo taem yu gat samting blong talem. Tingbaot se evriwan i gat raet blong jus tru long balot boks. Olsem wan yang vota, bambae voes blong yu hemi impoten blong fiuja blong kaontri.

### Jusum gud kandidat blong yu

Taem yu stap tingting long man we bae yu vot long hem, tingbaot olgeta samting we i mekem se wan man hemi wan gudfala lida. Yumi wantem ol lida blong yu we oli hones, oli wok had mo pipol i save trastem olgeta, mo oli no tekpat long korapsen. Yumi wantem se oli putum ol nid blong pipol feswan mo wok blong impruvum laef insaed long komuniti. Ol lida blong yumi oli shud kea abaot ol raet blong ol woman, pipol blong ol smosmol komuniti, ol maenoriti mo pipol wetem disabiliti. Ol lida blong yumi ol shud kea abaot edukesen, helt kea blong pipol mo emploimen opotuniti blong ol yangfala. Hemi impoten se kandidat we bae ripresentem yu, hemi kea abaot yut mo hemi wok tu blong lukaotem gud envaeromen long ol aelan blong yumi.

Ol yut oli save gat influens long ol politikal pati mo ol indipenden kandidat. Vot blong ol yut hemi impoten tumas long wan eleksen. No mas fogetem se vot blong yu hemi gat semak valiu olsem vot blong wan olfala man.

**Wanem nao ol trifala samting we oli impoten tumas we ol politisen oli shud mekem blong kaontri?**

**Raetem ol top tri (3) tingting blong yu insaed long eksekses buk blong yu.**

**Yu save nem blong MP blong konstituensi blong yu?**



## Vot

Nomoli, i gat wan Polis Stesen long wanwan Poling Distrik, be long ol eria we populesen i bigwan tumas (olsem long ol ples raon long taon), i save gat moa long wan Poling Stesen long wan distrik. Plante taem ol Poling Stesen oli stap long ol skul mo ol komuniti senta, mo ol staf blong Vanuatu Elektrol Ofis nao oli manejem. Polis i provaedem sekuriti long ol ples we poling stesen i stap long hem.

## Ol Step blong vot long Dei blong Eleksen

Ol dei blong vot oli tekem ples long ol ofisol dei blong wok nomo, i neva tekem ples long wan wiken. Long Vanuatu, Poling i tekem ples long wan dei nomo, stat long 7:30 long moning kasem 4:30 long aftanun.

Ol prosija blong vot oli semak blong ol nasional, provinsol mo munisipol eleksen. Tingbaot se yu mas rejista bifo yu save vot long dei blong eleksen. Mekem sua se yu gat Nasional Aedentifikesen Kad blong yu mo rejista taem yu kasem 18 yia. Taem yu rejista, bambae nem blong yu i kamaot long Vota Roll long Poling Stesen blong yu. Spos nem blong yu i no stap long Roll, bambae yu no save vot.

## Hu nao bae yu save faenem long wan Poling Stesen?

### 3 ofisol:

- **Presaeding Ofisa:**  
Presaeding Ofisa (PO) hemi responsibol long ovarol manejem blong proses blong vot blong mekem sua se pipol i folem gud proses bifo taem blong poling, long taem blong poling mo afta long poling.
- **Poling klak 1:**  
Hemi responsibol blong jekem Aedentiti blong ol vota mo givim ol balot pepa.
- **Poling klak 2:**  
Hemi responsibol blong makem ink long fingga blong man we i vot finis.

Ol nara pipol oli alao blong kam insaed long Poling Stesen long taem blong vot, be Vanuatu Elektrol Ofis i mas givim otoresesen long olgeta. Oli no mas distebem proses o luk hu ia man we vota i vot from.

Ol man ia hemi:

- Media;
- Ol ejen blong kandidat;
- Ol Obseva blong ol lokol o intenasonal obseva grup.

Ol ejen blong kandidat mo ol obseva oli alao blong sidaon long wan eria we oli putum blong watjem proses mo mekem sua se evriting i hapen long stret wei.

## Eksesaes: Ol step blong vot – Dei blong Eleksen

Raetem ol namba 1 kasem 12 insaed long eksesaes buk blong yu. Luk ol step blong vot we i stap daon ia mo matjem tugeta wetem stret namba.

- Lukluk gud balot pepa ia mo faenem man we yu wantem vot long hem. Yu save faenem hem tru long foto blong hem o simbol blong olgeta.
- Givim left han blong yu long Poling Klak blong hemi putum ink long bigfala fingga blong yu.
- Soem long Poling Klak se yu gat wan balot nomo.
- Putum balot blong yu insaed long balot boks.
- Go long rum blong vot.
- Poling Klak i givim wan balot pepa long yu.
- Yu livim Poling stesen.
- Poling Klak i lukaotem nem blong yu long list blong Voter Roll.
- Tekem bak Nasional ID kad blong yu.
- Tikim nem blong kandidat we yu wantem vot long hem.
- Soem Nasional ID kad blong yu long Poling Klak.
- Taem Poling Klak i faenem nem blong yu mo i jekem aedentiti blong yu, bambae hemi tikim nem mo namba blong yu.

Ol man we oli vot oli mas soem Nasional ID kad blong olgeta long Poling Klak blong save kastem vot blong olgeta. Spos wan man i no soem Nasional ID blong hem, bambae hemi no save vot.

Poling Klak bae jekem elektrol roll blong konfem se nem blong vota i stap long list, mo sipos vota i stap long raet Poling Stesen. Spos nem blong wan man i no stap long elektrol rol, bae hemi no save vot, nomata sipos hemi gat wan valid ID kad. Poling Klak i jekem ol infomesen long ID kad blong luk se man ia hemi semak man olsem we i stap long ol infomesen blong hem (ej, jenda etc...). Spos i stret, bae Poling Klak i tikim namba blong vota long left saed blong majin (laen we i seperetem).

Vanuatu Elektrol Ofis (VEO) i gat wan polisi blong mekem prosija blong vot blong ol pipol wetem disabiliti long wan wei we i isi long olgeta. Eni vota wetem wan fisikol disabiliti bae save jusum wan man we hemi wantem – man ia hemi mas wan vota we oli rejistarem hem finis.



## Vot blong yu hemi sikret


Nogat man bae save hu ia man we yu vot long hem mo i no nid blong talem long eniwan. Vot blong yu hemi sikret. Sipos wan man i mekem yu fraet o fosem yu blong talemaot hu ia man we yu vot long hem, yu ripotem hem long polis.

## Arenjmen blong Poling Stesen

### Wan Regula Poling Stesen


I gat tri (3) ofisol we oli manejem wan Poling Stesen:

- Presaeding (ritening) ofisa (PO)
- Tu (2) poling klak (2 poling klak i mekem wan jekpoen)



### Mega Poling Stesen

Long ol bigfala ("mega") Poling Stesen (plante taem long ol eria long taon), bae save gat plante jekpoen blong spidimap proses, mo tu wan man blong kontrolem laen blong mekem se ol vota oli folem gud proses blong vot kasem en.





# Lesen 13: Olgeta Eleksen Ofens mo Impotens blong Vot

I gat plante loa, rul mo regulesen we i kavremap ol eleksen. Hemia hemi impoten from yumi evriwan i wantem blong eleksen i fri, fea, transparen, yumi save trastem mo hemi gat pis. Hemi responsibiliti blong evriwan blong folem loa mo no mekem eni samting we i go agensem loa. Taem yu mekem wan samting we i rong, oli kolem se hemi wan ofens mo hemi save mekem yu pem wan faen o go long kalabus.



## Eksesaes: Raet o Rong?

Raetem namba 1 kasem 12 long wan kolum insaed long eksesaes buk blong yu. Ridim ol steitmen daon ia mo yu jusum: hemi raet o rong? Raetem ansa blong wanwan steitmen insaed long eksesaes buk blong yu.

1. Mi vot long Poling Stesen blong mi finis mi ron i go narasaed aelan mo mi vot bakegen long Poling Stesen blong fren blong mi. Mi glad tumas from mi save mekem 2 vot!
2. Mi save vot long eni Poling Stesen long distrik blong mi.
3. Fasin blong kiaman se yu wan nara man mo yusum Nasonal ID kad blong man ia blong vot hemi wan bigfala ofens.
4. Vot blong mi i gat bigfala valiu: wan kandidat i givim 2000 Vatu long mi blong mi vot long hem.
5. Fasin blong givim samting hemi pat blong kalja blong yumi. Mi save akseptem ol kakae, drink mo narafala samting we wan kandidat i givim, mo promes blong vot long hem nomata sipos mi no folem promes blong mi. Vot hemi sikret, bae hemi neva save!
6. Fridom blong toktok hemi raet blong mi. Mi save talem eniting abaot wan kandidat, nomata se hemi no tru.
7. Man bae kasem panis sipos hemi stopem wan elektrol ofisa blong mekem wok blong hem, nomata sipos ofisa i mekem wan samting we i rong.
8. Fasin blong distroem o stilim ol balot pepa bae putum mi long bigfala trabol.
9. Mi save tekem foto blong balot pepa blong mi mo sendem i go long ol fren o feveret kandidat blong mi blong soem vot blong mi long olgeta.
10. Givim infomesen we i no tru long ol elektrol otoriti hemi wan kiaman mo hemi wan fasin we yu no shud mekem.
11. Olgeta eleksen ofisol nomo oli save handelem balot boks o/mo ol narafala eleksen materiel.
12. Sista blong mi i luk semak long mi. Mi save tekem ID kad blong hem mo vot long ples blong hem. Hemi oraet nomo from mifala i famili.



### Wanem nao ol mein elektrol ofens?

1. Vot plante taem.
2. Vot long wan ples we hemi no Poling stesen blong yu.
3. Kiaman se yu wan nara man mo vot long ples blong hem.
4. Bribery: risivim mane long wan kandidat mo promes blong vot long hem.
5. Treating: akseptem ol kakae, drink o eni samting olsem eksjenj blong vot long wan kandidat.
6. Mekem ol kiaman toktok abaot ol kandidat.
7. Stopem wan ofisa blong mekem wok blong hem.
8. Destroem o stilim ol balot pepa.
9. Mekem se vot hemi no moa wan sikret.
10. Givim kiaman infomesen long ol elektrol otoriti.
11. Kam insaed o distebem balot boks o eni narafala material blong eleksen.



I gat ol narafala ofens we i aplae long ol kandidat mo ol rul abaot wanem oli save mekem mo wanem oli no save mekem. Long taem blong kampen, oli save holem ol rali, mekem ol posta mo liflet mo ol narafala samting blong winim tingting blong pipol blong vot long olgeta. Sipos wan kandidat i ofarem mani o givim samting long eksjenj blong wan vot o traem blong mekem ol vota oli fraet, hemia hemi wan ofens.

Hemi raet blong wan sitisen blong ripotem eni elektrol ofens. Sabmitim wan kes tru long nomol kot, insaed long period blong 21 dei stat long dei we ofens i tekem ples.

Hemi raet blong eni kandidat o sitisen blong putum wan elektrol petisen blong jalenjem ol risal blong eleksen. Ol elektrol petisen ia oli mas presentem insaed long wan period blong 21 dei blong pablikesen insaed long Ofisol Gazette blong ol risal blong eleksen. Suprim Kot nao i lukluk long ol petisen.

# From wanem yumi vot?






## Eksesaes: Klas Dibet

### Vot hemi wan samting we evriman i shud mekem?

Impotens blong vot hemi kamaot long stamba tingting se patisipesen hemi wan aspek blong demokrasi we hemi impoten, mo man i no save negosietem - wan sivik diuti (responsibiliti) mo hemi no jes wan raet.

Plante demokratik gavman oli tekem vot long ol eleksen olsem wan raet blong sitisen. Sam oli biliv se patisipesen long ol eleksen hemi wan sivik responsibiliti tu blong wan sitisen. Samfala kaontri oli mekem vot i kompalsori tru long loa mo kasem poen we oli putum ol panismen olsem ol faen long ol pipol we oli no vot. Level blong kompalsori voting we oli enfosem hemi difren folem ol kaontri.



### Dibet:

Tim we i SAPOTEM steitmen i talem se vot hemi wan samting we evriman i shud mekem. Tim we i AGENS bae talem se hemi no agri long steitmen ia.

Yu no nid blong pesonoli agri wetem steitmen ia blong toktok strong from.

Jeaman i manajem proses blong dibet, invaetem ol spika blong toktok long taem blong olgeta, mo jekem taem. Wanwan spika i gat 2 minit maksimam blong toktok.

Jeaman i jekem gud taem. Hemi givim saen taem spika i gat 10 seken nomo i stap. Afta long 2 minit, spika i finisim toktok blong hem mo hemi mas stop blong toktok.


Afta we tugeta saed i toktok, tugeta tim bae gat 2 minit blong pripea blong tok agensem nara tim mo mekem samari.

Feswan, bae AGENS tim i presentem toktok blong olgeta mo SAPOT tim i presentem 2 minit tok bak blong olgeta mo givim samari.

Dibet i finis long ples ia.

## Dibet: vot hemi wan samting we evriman i shud mekem


Tingting blong mifala:



Rison blong mifala:


1. ....

.....  
 .....  
 .....  
 .....  
 .....



2. ....

.....  
 .....  
 .....  
 .....  
 .....



3. ....

.....  
 .....  
 .....  
 .....  
 .....

Evidens long rison blong mifala:

Tok Agensem:

Mifala tingting oli telem se:

.....  
 .....  
 .....  
 .....  
 .....  
 .....  
 .....

Afta mifala save tokbak wetem:

.....  
 .....  
 .....  
 .....  
 .....  
 .....

## Ol opinion blong tugeta saed

### SAPOT

- Fasin blong vot hemi wan nesereri pat blong ol diuti blong sitisensip, semak olsem diuti blong wan juri long kot, pem taks, mo edukesen we pipol i mas kasem.
- Palemen i tingting gud long "will of the electorate."
- Gavman i mas konsidarem evri vota insaed long ol polisi mo manejmen blong olgeta.
- Ol kandidat oli save tokbaot moa ol isu long ol kampen blong olgeta, insted blong enkarejem pipol blong vot nomo.
- Givim bigfala lejitimesi long gavman we oli elektem.
- Ol kandidat we oli winim ol sit oli winim moa vot blong pipol.
- Long ol kaontri we i gat smol tenaot nomo, ol kandidat oli save win wetem wan smol % blong total vot.
- Wan lo tenaot i mekem se i gat plante kwesten abaot lijitimesi blong ful politikol sistem: "Wan lida we oli elektem i gat wanem raet blong rul sipos plante pipol i no vot long hem?"
- Insaed long wan demokrasi we hemi blong pipol, evriwan i mas gat wan voes blong disaed long wan samting.
- Wetem tingting se evriman i shud vot, Australia i gat wan sivik patisipesen long wol we i moa hae (95% man i go vot), kompea long Tonga (67%) mo United States of America (57%) long US presidensol eleksen.
- Enkarejem bigfala patisipesen blong ol grup wetem lo patisipesen reit. Involuntari vot, pipol we oli pua mo oli no skul gud oli no stap vot, mo hemia i muvum politik tuwod olgeta we oli rij mo oli skul gud. Mo taem oli no vot, ol politisen oli no mekem polisi blong olgeta, mo hemia i adap long kaen ia we oli nogat tumas opotuniti blong save mekem samting.
- Wetem tingting se evriman i shud vot, ol kandidat oli mas luksave mo konsidarem ol nid.
- Tingting se evriman i shud vot inkrisim politikol edukesen blong pipol from oli givim moa atensen long politik sipos oli save se oli mas vot.
- Tingting se evriman i shud vot i no fosem wan man blong jus. Pipol i stil save putum wan waet balot pepa insaed long boks. Oli no fosem man blong vot long eniwan from we hemi sikret.
- Tingting se evriman i shud vot i mekem politik i moa responsif long pipol. Ol kandidat we oli no gat mani oli no nid blong spendem mani blong pusum ol vota oli kamaot mo vot.

### AGENS

- Ol sitisen oli gat raet blong jus blong vot o no vot.
- Hemi no demokratik blong fosem pipol blong vot mo hemi wan vaeolesen blong fridom.
- Demokratik lejitimesi blong ol gavman we oli elektem anda long kompalsori vot, i save gat kwesten sipos oli fosem olgeta blong vot.
- Kompalsori vot i ridusum lejitimesi blong ol MP we oli elektem olgeta from oli winim ol vot blong pipol we oli no intres mo no kasem gud infomesen, be from oli mas mekem.
- Hemi leftemap namba blong ol "donkey votes" (pipol i mas vot long eni kandidat folem loa be oli no tingting long ol kandidat we oli vot long olgeta).
- i save leftemap namba blong ol vot we i no valid (ol balot pepa we oli spolem o no makem gud vot).
- Ol vota long ol koantri we vot hemi kompalsori olsem se oli no politikoli eduketed (mo ating i nogat tumas) bitim ol vota long ol vota long ol koantri we vot hemi voluntari (olsem Australia vs. New Zealand).
- Kompalsori vot i fosem pipol blong vot long wan man nomata we oli no laekem eni long ol kandidat we oli stanap.
- Voluntari vot i no neserili givim feva long olgeta pipol we oli rij o skul gud. Long plante kaontri, pipol we oli pua mo no skul gud oli save oganaesem olgeta long bigfala namba mo sapotem ol kandidat we oli sapotem ol konsen blong olgeta.
- Taem vot hemi kompalsori i mekem politikol sistem i no responsif. Sipos oli mekem vot i kam voluntari, bae hemi shekem politikol sistem. Bae ol Pati mo ol kandidat oli trae had moa mo mekem moa efot blong winim tingting blong pipol abaot ol advantej blong ol polisi blong olgeta blong mekem ol man oli go vot.
- Hemi kostem plante mani blong manejem ol eleksen wetem ful adult populesen we oli vot (inkludum ol kost blong manejem ol faen blong ol non-vota).
- Hemi moa jip blong gat voluntari vot.



